

Lekgotla le diha kahlolo e kgahlano le tshebediso e mpe ya mokgwatshebetso wa tsa makgotla ka molefalekgetho

Tshwane, 23 Loetse 2021– Ditshebeletso tsa Lekgetho tsa Afrika Borwa (SARS) di ananetse kahlolo e dumellanang le tsona e mabapi le kopo ya molao eo motheo wa yona o hlokanang mabaka le ho senya nako e kgahlano le Mong. Gary van der Merwe mmoho le ba bang mane Lekgotleng le Phahameng la Cape.

Ke lekgetlo la pele nalaneng ya SARS moo mokgatlo ona o entseng kopo ya molao e mabapi le hore motheo wa taba ya molefalekgetho o hloka mabaka le ho senya nako ka sepheo sa ho diehisa kgatelople ya tsa molao.

Pejana bekeng ena, lekgotla le fumane hore ketso ya molao ka Mong. van der Merwe le ba bang "e na le kotsi ya nnete" ya ho ba le kgahlamelo e mpe hodima mokgwatshebetso wa tsamaiso ya tsa toka le hore ketso ena e mpa e sebedisa metjha ya tsa makgotla ka tsela e fosahetseng.

Ho ya ka kahlolo ena, ketso ena ya ke mohlala o mobe wa ka moo molefalekgetho a sebedisang tsa makgotla hampe ka teng mmoho le ho etsa diqoso tse hlokanang motheo kgahlano le SARS tse mabapi le manyofonyofo, boqhekanyetsi le ditshoso.

Diphetho tsa kahlolo ena di bolela hore ho tloha jwale Mong. van der Merwe a ka se hlole a nka dikgato kgahlano le motho ofe kapa ofe (ho akareditswe le SARS) ntle le ho fumana tumello ya lekgotla. Kahlolo ena e sebetsa ho Mong. van der Merwe ka seqo mmoho le ho yena jwalo ka setho sa therasete kapa molaodi wa khampani efe kapa efe mmoho le ho ditho tsa therasete e bitswang Eagles Trust.

Khomishenara ya SARS Edward Kieswetter o boletse hore ketso ena ya molao ka Mong. van der Merwe le ba bang ya dilemo tse fetang tse leshome e ne e ikemiseditse ho thibela mokgatlo ho phethahatsa thomo ya ona ya molao le ho nyahamisa boiteko bofe kapa bofe ba ho phethela ditaba tse neng di le mabapi le yena.

"Ka mehla SARSe tla tswela pele ho fana ka tlhakisetsa le nnetefaletso ho balefalekgetho ho ba thusa ho ikobela boitlamo ba bona. Moo ho nang le kganyetsano, SARS e na le mekgwatshebetso ya ho rarolla ditaba tsena ntle le ho leba dikgatong tsa molao. Sena ha se thibele balefalekgetho ho sebedisa tokelo ya bona ya ho fumana kimollo makgotleng ebang ba sa kgotsofalla diphetho. Le ha ho le jwalo, balefalekgetho ba sebedisang makgotla ho diehisa le ho nyahamisa pokello ya makgetho ba tla kopana le pela di falla."

Khomishenara o boletse hore o tshepa hore kahlolo ena e tla thibela ba bang ho nka mehato ya molao e hlokanang mabaka le ho senya nako kgahlano le SARS ka sepheo sa ho e diehisa ho phetha thomo ya yona e ka sehloohong, e leng ho bokella lekgetho lohle le hlokehang ho thusa Mmuso ho aha puso e nang le bokgoni bo tlang ho thusa ho tsa phedisano le ntshetsopele ya ikonomi ya naha ya rona le bophelo bo botle ba Mafrikaborwa kaofela.

Ho fumana lesedi le fetang lena, ka kopo ikopanye le SARS ho SARSMedia@sars.gov.za